

112 年全國語文競賽客家語朗讀文章高中學生組（饒平腔）

編號 1 號

【簡單个幸福】徐姿華原作

打早，涼涼微風並略略天光，掀開間房个白紗窗簾，摺正對甜甜夢肚醒來个僵攞手；難得个放棄日，韌在眠床暝日頭輕輕徒步、聽窗外鳥聲吱啁，時間也像恬恬頓腳了，啊！這靚靚个晨早。

食過朝，想去尋久無見个朋友。自家駛車，時間斯在自家个手頭，做得慢慢行、定定奈；經過鬧熱个街市，車輪慢慢輾落鄉道，來到苗栗个穀倉——灣裡。路个兩片脣，金黃飽米个禾串硬硬會對禾田淳出來；風吹來，一陣一陣歡喜到手攞腳踏、搖頭扭腰个金黃稻浪，實在還鬆爽。田脣企等兩個在該比手畫腳个阿伯，日頭晟來，笠婆下炙到烏刻刻个面町，單淨脛著兩排雪白个牙齒，想來應該當滿意今年係好年冬啦！

幹過一隻大彎幹，共樣係闊野野个禾田，直直透到山下；深深淺淺个黃襯等青青个田脣、綠綠个大樹，像係天公伯个調色盤，乜係這隻豐收个季節正有个景色。該向有幾坵既經收忒早冬禾，準備愛過蒔二冬禾个禾田，田水清清清，將朗朗个藍天摺白雲、田脣个樹摺人家屋，明明明反映出來，斯像框在田脣做个相

框肚个相，實在有罅靚。這向堵好有一坵田當在該割禾，紅色个割禾機在田肚緊行緊割，三、四個人在脣頭搵手，無閒泊杈；割禾機後背跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係禾田肚最有生命力个畫面了啦！

車慢慢駛落莊頭，伏在路脣个老狗牯脛著車來，伸懶筋企起來拂尾，像迎接老朋友个樣。一個著花衫个伯姆站在屋面前个菜園摘菜，菜園分屋蔭等、日頭旨有炙著，青呵呵个菜葉面還有露水，脛來當萋、當錫人食樣。兩個國小年紀个細俵條仔，一儕慢慢踏自行車、一儕半行半走、手還拗等籃球，嘻嘻嘩嘩有講有笑愛共下去打球。這一路个光景，實在分人心情舒爽。

主人家款好一桌點心、地豆摺瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日、靚靚个心情，這斯係簡單个幸福。

112 年全國語文競賽客家語朗讀文章高中學生組（饒平腔）

編號 2 號

【陂塘】許倩雯原作

用鏡頭記錄臺灣這片土地個導演齊柏林，坐直升機對天頂睇往下，形容桃園個陂塘就像係「散落一地泥个水晶，金皙皙仔<sup>1</sup>！」

兩隻白鶴一前一後在陂塘面頂飛過，白雪雪个身影倒映在平靜个水面。水蓮花<sup>2</sup>對青青个水肚探出頭，細細蕊个黃花就像天頂一眨一眨个星仔，靚到耐毋得。

立秋正過啊忒，陂塘就飛來了一群準備愛過冬个人客！長腳鳥<sup>3</sup>水紅色个長腳，躡在淺水所在定定仔行，鳥觜在水肚掃毋停，無閒在該尋食。花啦花啦个細水鴨將頭那澆入水肚，屎肫翹到半天高。忽然間，一粒扁扁个石頭飛啊過來，嚇到這群鳥仔披翼飛起。原來係陂塘脣，來了一陣細孬仔在該打水漂仔。坐在樹下擎等懸旌个男仔人，大聲罵：「人在這懸魚仔，你兜孤盲頭在該變麼个齣數，莫來這爽！」

月華蹶上天頂，在水膠地个合界，白鶴花<sup>4</sup>个清香跔等夜風散開來。夜呱<sup>5</sup>醒了，昏哆昏哆<sup>6</sup>个喊了幾聲「嘎！嘎！嘎！」像烏鈕仔恁大个蜗蠕仔扭等尾泗水，臉身既經生出四支腳了，在陂塘个一角尋所在上岸。蛇發覺在水肚跳出來个烏影，黏時對草竇趨啊出來，開始逐佢兜！

有人將桃園喊做「千陂之鄉」，這肚底像碗公樣仔，大大細細个陂塘，全部係人工挖出來个。先民在開墾个過程肚盡艱苦，高不將挖陂塘來頓水蔭田。陂塘最多个時節，有萬過隻，也變成桃園最特殊个地理景色。每一隻埤塘都有自家个故事，當多人第一擺个泗水、第一擺个懸魚仔，都係在埤塘發生。

年堵年，跔等時代流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，也係公園。伸下來个陂塘，經過整頓，嘎有了新生命个延續，變做現代人休閒遶寮个好所在！

<sup>1</sup> 金皙皙仔：音 gim<sup>ˇ</sup> siag<sup>`</sup> siag<sup>`</sup> er<sup>`</sup>；金光閃閃。

<sup>2</sup> 水蓮花：音 fi<sup>`</sup> lien fa<sup>ˇ</sup> / fi<sup>`</sup> len<sup>`</sup> fa<sup>ˇ</sup> / fi<sup>`</sup> lien<sup>`</sup> fa<sup>ˇ</sup>；臺灣萍蓬草。

<sup>3</sup> 長腳鳥：音 chong giog<sup>`</sup> diau<sup>ˇ</sup> / cong<sup>`</sup> giog<sup>`</sup> diau<sup>ˇ</sup>；高蹺鴛。

<sup>4</sup> 白鶴花：音 pag hog fa<sup>ˇ</sup>；野薑花。

<sup>5</sup> 夜呱：音 rhia<sup>´</sup> gua<sup>ˇ</sup> / rhia gua<sup>ˇ</sup> / ia gua<sup>ˇ</sup>；夜鷺。

<sup>6</sup> 昏哆昏哆：音 fun<sup>ˇ</sup> de<sup>ˇ</sup> fun<sup>ˇ</sup> de<sup>ˇ</sup>、fun de fun de；頭暈腦脹。

112 年全國語文競賽客家語朗讀文章高中學生組（饒平腔）

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載還係梅雨季節，落過雨、起風了，將就摻冷氣關忒，行到窗門口感受熱天難得个涼風。除忒幸運睡著天邊靚靚个七彩天虹，還鼻得著打馬膠路<sup>1</sup>分日頭花煎過、分雨水打過以後淡淡、香香个味緒，臨暗頭窗門外背一陣一陣「啖啖啖——啖啖啖——」个蟬仔聲順等清風傳入屋肚來。

佢想起還細時節，熱燻燻个下晝頭，佢這兜姊妹會摻隔壁鄰舍个細人伴共下爽，輒輒爽到斷烏，聽著阿姆開聲喊：「好轉來洗手食飯了！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就摻蒜頭礮礮啊、再剁到幼幼，泔一息仔豆油還過香油，先放在碗公肚，續等摻煮好个麵撈起來，水泌分佢燥，再將麵漕落碗公，摻麵合蒜頭、配料攪分佢勻，該量時係聽到佢爸問：「有麼人愛食麵無？」佢這兜就當暢，遽遽飄入灶下，你一口、

佢一口，又賺著一餐香噴噴个大麵夜宵，食到飽餬餬仔，還幸福哪！佢爸將伸个飯菜間等伸無幾多條个麵，儘採划落肚，就恁樣過一餐。

又還記得，熱天臨暗頭洗好浴腳，等到食飽夜，碗箸撿掣，寫好作業，睜一下電視，細人仔還細又好爽，差毋多到愛上眠床該下，又一身汗了；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣掙開來，等大家愛睡該下，間房門打啊開來，涼沁沁个冷氣，還有阿姆提去晟過日頭个被骨，發出香香个日烈味緒，歸屋下人尖到兩頂眠床町，無一下仔就睡落覺了。

這幸福个滋味一直園在佢个心肝頭，毋多知仔成人長大、做人阿姆以後，正知「賺錢可比針挑笏，使錢可比水推沙。」正體會爺哀頭擺辛苦畜大佢這兜恁多個細人仔、愛理一隻家哪有恁該！毋過該愛盡个責任摻義務，佢兜從來都毋識放忒過。

<sup>1</sup> 打馬膠路：音 daˋ maˋ gauˋ luˋ / daˋ maˋ gauˋ luˋ；柏油路。

112 年全國語文競賽客家語朗讀文章高中學生組（饒平腔）

編號 4 號

【頭回蹶大山】范振新原作

「避暑來去蹶百岳，愛無？」斯因為這句話，偲俚三兄弟斯跔等滿叔，共下去蹶人生在世个第一座大山。該量時，佢還毋知蹶恁樣个高山有麼个特別，乜毋了解蹶三千米以上个山愛知得哪兜孔竅，佢這從細戴山肚个半頭青還話著撈頭擺蹶个五指山、石門山這兜淺山仔爭七毋爭八<sup>1</sup>，無頭無腦斯想跔等去，正經係細和尚仔唸金剛經——毋知頭又毋知尾。

記得該擺蹶个係池有山撈品田山，滿叔安排兩日兩夜。頭暗晡偲俚先歇在武陵農場，第二日打早六點就出發，按算斷烏前行到新達營地。頭下碼正開始蹶該下，佢話著自家个體力當好，平常乜有運動个習慣，所以行盡遽，想愛早一息蹶上山頭。無胚著，正行點零鐘斯佇毋著，歸身汗流脈落，強強會故氣毋出。

佢試著盡奇怪，這擺愛蹶山以前，佢還釘工逐日去運動坪練習，仰會還係恁恫？背尾正知，係因為山頂个氧氣較少，又愛背食糧、滾水、襖婆這兜加加起來完十公斤个東西，身體需要還較多个能量，正會行一細截就故大氣。該載，老弟乜撈佢共樣，佢

緊故大氣緊問滿叔：「會到旨？還有幾遠？」滿叔笑笑仔應講：「還旨得時哦，登山口就還旨到啊！加油！」聽著滿叔恁樣講，佢正經愛嘍就無目汁，高不將撈自家个包袱擱起來刻耐仔續等行往上。滿叔又講：「毋好行恁遽，山又毋會走忒，定定仔行斯好，恫了就頓恬下來歇睏，山頂个光景當靚哦！」

斷真，山頂个路彎彎幹幹，毋過見轉一隻彎斯有新个天地，在山肚滿哪仔都係好風光，尤其係對面層層疊疊个山，在半山排遠遠睺過去，一片青里里，再加上青天撈白雲不時个變化，每一分鐘、每一秒都像係無共樣个風景明信片。歸路還有鳥仔、蟲仔在該唧唧唧唧，佢斯在這大自然个音樂會裡肚，一頭享受山頂个美景；一頭手爬腳蹶繼續行。三不二時還做得睺著鷓婆在天頂飛來飛去，感覺當自在、當自由。就在佢睺到戇神發琢呆个時節，忽然間聽著阿哥大嫲牯聲喊：「噯！睺著三角點囉！」佢煞煞三步準兩步走等上。等蹶到山嶺頂，心肝肚个感動，害佢目汁就險流出來。

到該下佢正知，蹶山恁錫人个原因。

<sup>1</sup> 爭七毋爭八：音 zangˋ cidˋ m zangˋ badˋ / zangˋ cidˋ mˋ zangˋ badˋ；差不多。

【特別个水煎包】曾俊鑾原作

水煎包這種傳統點心滿哪仔都睭得著，臺灣个水煎包大體係包高麗菜个，毋過當好運，佢在學校食過一種特別个水煎包。

下晝三點過後日頭轉影<sup>1</sup>，天時較涼哩，下課同學會湊等去打籃球，成時會睭著，一個背痾痾个外省老阿伯企在側角。佢捕等一隻籃仔，當像驚人知樣，把守一隻無法度講个秘密，佢出現个時節總係該睭這睭，等佢兜行前去，正細義細義掀開幪在籃仔面頂个布仔，係一籃正起鑊無幾久還燒燒仔个水煎包。

佢兜當當在該轉骨<sup>2</sup>，做儘像飯豚仔<sup>3</sup>樣，到下晝早就枵到屎肚憑背囊哩，逐儕歡喜塵天摟錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換佢請你，好無？」兩下半，本成疊到錐錐个水煎包就分人提忒兩三層。

水煎包下背墊張紙，佢兜連洗手都懶，五支手指頭托等，張嘴就齧<sup>4</sup>落去，當像毋會燒人樣，緊呵緊講：「好食！好食！」水

煎包有較赤<sup>5</sup>，老阿伯盡周到，既經薄薄仔先拏<sup>6</sup>過辣油，佢个水煎包係正宗上海、蘇州个江南口味，豬肉做個料仔，摻等雞卵、蔥仔、香油、鹽這兜配料，係講你个嘴罅精，你還食得出有播到綿綿<sup>7</sup>个薑嫲，毋敢食辣个同學，也試著好食。

佢兜緊食緊摻隔壁球場个人攞手，摻食到伸半隻个水煎包提到高高，喊佢兜愛買就愛趕緊，機會難得，過忒這擺，下二擺毋知愛等到哪時。結果，佢兜做儘分好食个水煎包錫錫<sup>8</sup>過來，連平常較有規矩个細妹仔也湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風馳雨<sup>9</sup>，摻這場正開始鬧熱个生理打到浪浪散，高中部个教官仔行過來哩，佢本成就面北北，這下還較像牛頭馬面，大自家走到尾瀉屎，外省老阿伯也摻籃仔攞起來，恬恬行往出，從哪搭仔出現，就從哪搭仔毋見忒去。

單淨水煎包个味緒還留在嘴肚。

<sup>1</sup> 日頭轉影：音 ngid` teu zhan` rhiang` / ngid` teu` zan` rhiang` / ngid` teu` zan` iang`；日影偏斜。

<sup>2</sup> 轉骨：音 zhan` gud` / zan` gud`；青春期長高的意思。

<sup>3</sup> 飯豚仔：音 pon` tun er` / pon tun` / pon tun` e`；喻發育中的青少年食量很大。

<sup>4</sup> 齧：音 sen` / sen`；咬。

<sup>5</sup> 赤：音 chag` / cag`；黃褐色，喻煎得表皮焦黃。

<sup>6</sup> 拏：音 so`；抹上。

<sup>7</sup> 播到綿綿：音 lui do` mien mien / lui` do` men` men` / lui` do` mien` mien`；研磨得很細。

<sup>8</sup> 錫錫：音 sia sia / sia` sia`；吸引。

<sup>9</sup> 風馳雨：音 fung` chi vu` / fung` ci` vu` / fung` cii` vu`；西北雨。

112 年全國語文競賽客家語朗讀文章高中學生組（饒平腔）

編號 6 號

【整老屋】李得福原作

前一站仔，不時會睺著阿公坐在廊仔下睺通書<sup>1</sup>，手提筆緊寫緊記，嘴肚還會緊唸這日仔當好，但係拆舍毋合。阿公講：「老屋个屋頂琉璃瓦舊了，底層攤个防水塑膠布爛忒了，所以逐間屋都會漏雨，該種防水布，細老鼠會弄落去作竇，盡遽壞，成十過年就愛換一擺當麻煩，揚瓦重鋪个工錢當傷重<sup>2</sup>。偃想換過鐵桁礮亞鉛餅，偃做主事人，一定愛選著膠偃無犯、無煞个好日腳正做得動工。」阿公擇日个學問，偃兜無學過也聽毋識。

老屋在檳榔園裡背，用紅磚仔結到棟，密麻蹟跡<sup>3</sup>个樹桁頂，蓋紅黃色个琉璃瓦，遠遠睺去嶄然靚。係阿公後生時做个四合院，總共有十五間，但係戴無幾久，全家徙去街路做生理，老屋門門到今有四十零年，每日正伸阿公阿嬤會騎奧多拜轉去祖堂拜神。前年阿公發覺天棚頂个樹桁仔，分白蟻蛀淨淨，每一間屋都斷幾下支，舊年想愛整，毋過年皇<sup>4</sup>毋著整毋得，拖到今年大利東

西个年皇正做得整。

過年過節轉老屋敬祖公前幾日，阿公會請清潔公司去拚掃一遍，方便子孫拜祖先拜神，順續辦三張桌席，大家聚餐聯絡感情。毋過舊年開始，驚琉璃瓦會跌下來傷著人，兩片橫屋都有牽索仔，禁止人員落去，好在祖先有保佑，廳下个桁桷還好好，子孫正做得拜神。

禮拜日轉去菁園搵手摘菁仔，睺著拆屋師傅提等電鋸，坐在壁扇頂高將桁仔鋸斷，瓦膠桁桷做一下跌下來，砰砰滾當得人驚。細山貓个推土機將廢棄物集中在禾埕，拖拉牯<sup>5</sup>停在路脣準備載去漕；阿公行上行下、比手畫腳在該指揮，當像拍電影个導演在該拍一齣戲。阿嬤買當多客家粿粿、紅粿、芋粿、粽仔，分做事个工人做點心，又泡一大茶罐麥仔茶分佢兜啲。

下二擺轉去菁園剪菁仔時，睺著老屋既經變另外一座身影，深紅色个瓦型鐵皮奔好了，日頭箭在深紅色个鐵皮頂霞光燦爛，幾下个泥水師父在該修補壞忒个壁扇膠地泥，水電師傅共下在該整電火、巡水管。青色个檳榔園肚一座紅堡壘，係子子孫孫心靈个寄託，老屋修整前、修整後个影像永遠印在偃个心肝肚。

<sup>1</sup> 通書：音 tung<sup>ˇ</sup> shu<sup>ˇ</sup> / tung<sup>ˇ</sup> su<sup>ˇ</sup>；民間的曆法和擇日的參考典籍。

<sup>2</sup> 傷重：音 shong<sup>ˇ</sup> diong<sup>ˋ</sup> / song<sup>ˇ</sup> diong<sup>ˋ</sup>；形容整修經費很多。

<sup>3</sup> 密麻蹟跡：音 med ma zid<sup>ˋ</sup> zia<sup>ˋ</sup>g / med ma<sup>ˋ</sup> zid<sup>ˋ</sup> zia<sup>ˋ</sup>g；密密麻麻的。

<sup>4</sup> 年皇：音 ngien fong / nen<sup>ˋ</sup> fong<sup>ˋ</sup> / ngien<sup>ˋ</sup> fong<sup>ˋ</sup>；流年曆。

<sup>5</sup> 拖拉牯：音 to<sup>ˊ</sup> la gu<sup>ˋ</sup>；語源於日語「トラック」，卡車。

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔，報紙放在矮桌仔面，棚等目鏡在該睺國家大事；阿姆坐在竹交椅，腳架在細矮圓凳，目聚聚仔睺等家庭副刊。日頭花對窗門斜斜箭入，屋肚恬靜恬靜，伏在桌頂个烏貓仔兩隻腳還撇等報紙在該睡，分个打門聲嚇著一下，擘開目珠懶懶仔睺過來，又伏轉去繼續睡个目。

老屋下有三條貓仔，全都係路脣拈來个。該當時還係細貓子，正開目<sup>1</sup>無幾日，分人用紙箱仔張等放在路脣草埔肚。阿爸散步經過，聽著細細仔喵！喵！喵个聲，正發現這兜衰過个細貓子。阿爸將細貓子帶轉屋下，滄一息牛乳在盤仔，細貓子鼻著牛乳味，搖搖擺擺<sup>2</sup>爬到盤仔脣，用軟軟个舌嫵緊舐，牛乳還膏在鬍鬚變白鬚仔，當得人惜。三條貓子个毛色無共樣，一條像乳牛一搭烏一搭白，尤其四隻腳个腳趾頭前白白，當像著白襪樣仔，就膠佢安名「細白襪」；另外一隻全身係烏金烏金个長毛，就喊佢

<sup>1</sup> 開目：音 koiˋ mugˋ；動物初次張開眼睛。

<sup>2</sup> 搖搖擺擺：音 rhiau rhiau baiˋ baiˋ / rhiauˋ rhiauˋ baiˋ baiˋ / iauˋ iauˋ baiˋ baiˋ；搖搖晃晃。

「長毛仔」；還有一條生著柑仔色，又有一浪一浪个花紋，就安到「細柑仔」。毋過阿姆無恁大神氣<sup>3</sup>記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變成活跳个大貓仔，不時會自家開窗門走出去野上野下，等到野恁了正對窗門鑽入來。貓仔本成係貓科動物，膠獅仔共樣有打獵个本能，雖然經過了一萬年个馴化，但係本能無完全消失。所以，暗晡頭時常會走出去打老鼠、透地龍、壁蛇仔轉來放在門頭前；日時頭還會在陽臺晡鳥仔，見擺係睺著佢恬索索仔跔在該，目金金仔睺等屋頂，總會有飛毋掣个禾鸚仔、斑鳩仔、月鴿仔分佢打下來。

這駁仔轉去老屋下，總會睺著三條貓仔目絲絲在該啄目睡，阿姆講：「這兜貓仔老了喲，毋多好出去寮了，逐日伏在屋肚睡。」係照貓仔个年紀來算，佢兜也係高齡貓了，逐晨早兩個睺報紙个老人家膠三條啄目睡个老貓仔就係老屋下个風景。

<sup>3</sup> 恁大神氣：音 anˋ taiˋ shin hiˋ / anˋ taiˋ sinˋ kiˋ / anˋ taiˋ siinˋ hiˋ；很費神。

112 年全國語文競賽客家語朗讀文章高中學生組（饒平腔）

編號 8 號

### 【一雙箸】黃秋枝原作

「好撿碗箸哦！」

佢係用箸个民族，從細就愛學會擎箸，愛學會擎箸之前爺哀挾食分佢，旨盡會使箸食飯以前，箸擎等搵上搵下，因為無熟絡划飯挾菜个技巧，嘎挾到浴浴跌；等到會使箸該下，又好擲擲仔這挾該挾，挾到歸碗係自家一等好食个菜。

屋下世大人長透教講：「箸毋好恁精！好食个東西愛曉得勻等來大家食。」阿姆乜教講，箸係有生目珠个，佢俚想食哪樣就睨準準挾啊起，毋好操去操轉搵上搵下，愛注重衛生摺禮貌正好。還有，食飯時節，箸愛擎正來，愛遵守擎箸个規矩，千萬做毋得用箸敲碗、敲桌仔像乞食仔討食樣；手指公摺指人指愛夾核箸个上截，另外三隻手指自然彎曲對齊，夾好箸个兩頭，指人指毋好搵起來像指等人罵樣；毋好咬箸；箸乜做毋得插在飯碗个中央；食飯提等箸準賭爽這兜禁忌。

係無，世大人就會大聲咄：「無人教詔係無？」過較嚴條个，無就箸頭嫵擦啊去，該餐飯乜有可能分世大人喝下桌。

盡記得，細時節佢屋下个箸，係竹仔做个，阿姆長透吩咐，

好天个時節箸愛提到日頭下炙，係無斯會生菇上烏點，愛落嘴个東西儘採毋得，愛知「病對嘴入，禍對口出」个道理。所以，還細時，炙箸乜係佢个頭路，一支一支仔頭對頭、尾對尾，擺開來提到天下炙日頭。

頭擺人，勾挽人客在屋下過餐乜會講：「糯米打棗罕得幾多時？便菜飯仔乜就加一雙『箸』定定。」斯愛人情好，食水乜甜，一雙「箸」增添了人摺人之間个交流摺感情。還記得，有一擺愛敬床公婆搵擺菜盤，佢就照佢俚食飯个規矩準備一雙箸，阿姆遽遽喊講摺箸提轉去，相傳，敬床公婆毋使擎箸，係擎箸敬床公婆，床公婆會提箸教示細人仔這種心色个講法。

人講，箸一頭圓一頭方就像天圓地方；手擎箸五隻手指愛上中下配合使用，代表天地人三才；箸一分為二，又合二為一，代表陰陽結合，包容、平衡、和諧。



編號 9 號

【細日頭】胡明華原作

細日頭係阿生畜个鸚哥<sup>1</sup>，兩片面頰卵有紅叨叨个圓箍仔，睺起來就像細細个日頭，所以安佢「細日頭」。佢臉身白白，尾長長，頂高有一抓長長黃黃梳到腦屎背个頭那毛，身形盡靚。

細日頭幼鳥時節就分阿生對店項接到屋下，從佢歸身無毛軟頭扁摺<sup>2</sup>到翼胛毛生到亮亮齊齊，最親个就係阿生，見睺著阿生，佢就歡喜靈天，暢到耐毋得<sup>3</sup>，啾啾滾緊唱歌。佢長透企在阿生个拈食指<sup>4</sup>抑係肩頭頂，不時佷兼來，用嘴輕輕仔啄阿生个面，啗出一細截舌嫵啖阿生，有時還會啖到耳砵，迂來迂去，實在心色。有一擺，阿生翕一張細日頭啖佢面个自拍相片，細日頭睺啊著，嘎又再過啖加一到，屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直<sup>5</sup>，攞等鳥籠去公園，學人放鳥仔，望想嘍細日頭飛出去

<sup>1</sup> 鸚哥：音 enˋ goˋ；鸚鵡。

<sup>2</sup> 軟頭扁摺：音 ngienˋ teu bienˋ zhabˋ / ngienˋ teuˋ benˋ zabˋ / ngienˋ teuˋ bienˋ zabˋ；此處指初生時長得醜醜的、皮膚皺皺的樣子。

<sup>3</sup> 暢到耐毋得：音 tiongˋ doˋ naiˋ m dedˋ / tiongˋ doˋ naiˋ mˋ dedˋ；高興得不得了。

<sup>4</sup> 拈食指：音 ngiamˋ shed zhiˋ / ngiamˋ sed ziˋ / ngiamˋ siid ziiˋ；食指。

<sup>5</sup> 毋知哪條腸仔毋直：音 m diˋ niˋ tiau chong erˋ m chid / mˋ diˋ niˋ tiauˋ congˋ mˋ cid / mˋ diˋ niˋ tiauˋ congˋ eˋ mˋ ciid；不知怎麼了。

再過飛轉來，想愛展風神。無想著鳥籠仔正打啊開來，細日頭翼撇撇仔，兩下半就飛到十二樓恁高，跔等就無魂無影了。阿生心焦到無結無煞，仰般形尋去尋轉都尋無？佢歸暗晡睡毋落覺，天旨光就緊拚拚仔再去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正再過相逢。

前一駁仔，阿生試著細日頭大了，就無注意照顧，淨顧自家个事，陪佢个時間緊來緊少。麼人知細日頭嘎開始背自家个毛，貼貼到有一日，兩片翼胛下總下擲到淨淨，就像人發病仔頭那敲毛光頭共樣共樣，這時阿生正緊張起來，遽遽送去鳥仔醫院。衰過正得啊！藥錢比人睺病還較貴！

人講「戇戇戇，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間趕事，毋會仰般，結果害了細日頭，也害著自家，正經係假精無錢賺。

這擺阿生學乖了，開始認真照顧細日頭，還分佢戴伊麗莎白頸圍<sup>6</sup>，避免佢再過咬翼胛下；也知得原來做鸚哥个主人愛盡用心，照顧好勢；不管佢到底係快樂也係悲傷？係發闕也係緊張？係肚枵也係嘴渴？甚至，佢係毋係愠悴？都愛耐心做伴，恁樣正會人鳥兩相安哪。

<sup>6</sup> 伊麗莎白頸圍：音 iˋ li saˋ pag giangˋ vuiˋ / iˋ li saˋ pag giangˋ vuiˋ；一種圓形中空套在寵物脖子上，用來防止寵物抓或咬傷身體的項圈。

【長薯仔】徐秀英原作

前一駁仔鼻空頭哼出一粒長薯仔，又紅又腫，當杈眼<sup>1</sup>又動毋得，一想著愛帶等佢出出入入，心情都煩躁起來了！做學生仔儕功課讀書壓力大，長透目無好睡恁足，有人講係火氣大引起，有人講係面無洗淨，毋過，同學都知，這係後生人个專利，專專記錄大家个青春，所以，長薯仔又安到青春痘。

長薯仔係得人畏个違章建築，就像在該亮亮个路面翹起來个水空蓋；像光滑个球面頂該粒撇毋下去个嘜風嘴。係歸面生到密密又貢膿，這時節定著愛注意感染个風險，係無正經就會分佢搵到無結無煞，就驚一無注意，生著白幼个面分外星人尖去戴，嘎變做礫礫砣砣个「月球表面」，到時節自家就只好刻耐仔「戴月球」了。

為著愛膠長薯仔外星人相輸贏，佢決定進行作戰計劃，經驗豐富个阿姆，順利登上指揮官个大位。因為鼻空頭該粒最大粒最疾，旨熟又及毋得<sup>2</sup>，阿姆提出佢个秘密武器，綠豆粉膠蜂糖，佢膠這兩項攪共下，膏在佢个鼻空頭，佢膠阿姆講，鼻空會分蟻公

<sup>1</sup> 杈眼：音 ca` ngien` / ca` ngien^；礙眼。

<sup>2</sup> 及毋得：音 kib m ded` / kib m` ded`；擠壓。

扛走無？阿姆緊笑緊脛佢，應講：「佢頭擺就恁樣膏好个，你這下个樣仔，怕毋會比佢還較慘！」

阿姆又講，食个東西做毋得忒躁，火氣大長薯仔正會緊哼。佢膠同學下課个時節，固定會去賣鹽酥雞个攤仔買雞排，炸到酥酥香香个雞排，淨想就會流口涎，再過愛赴上暗晡頭个課，雞排係當多學生仔當好个選擇。阿姆不時交代毋好緊食這兜，係無買隻麵包先砣屎肚，轉來正食正餐乜做得。毋過，就係掌毋核這張嘴啊！為著自家一面个春光，佢心想，死牛準生馬醫，就聽阿姆个好了！乜來調整一下飲食个習慣。阿姆个秘密武器毋單淨綠豆粉膠蜂糖，笏瓜、油蔥、黃連，菊花茶……，膏个食个樣樣齊。

每暗晡洗好浴到睡个一細段時間，佢會爽手機仔放輕心情。這時節，盡心个指揮官——阿姆，定著會來推門，門个該片阿姆大聲放送：「睡毋罇，長薯仔毋會好哦！」雖然抗痘个過程有一息難耐<sup>3</sup>，好得，佢這下个面有緊來緊亮線了。

<sup>3</sup> 難耐：音 nai ngai` / nai` ngai；難以忍受。